

Baze Istória! Boa Governasaun No Anti-Korupsaun

Baze istória

Epóka koloniál

Boa governasaun no anti korupsaun nu'udár teze ida ne'ebé la mosu mesak ka independente. Maibé mosu husi kondisaun konkreta ida, kondisaun objetiva ne'e maka, durante dekada rua nia laran, saida mak ita presiza halo, saida mak seidauk merese hodi halo no saida mak ita presiza kombat, nune'e ho hanoin ida di'ak ba dezenvolvimentu ida ba rai no povu ida ne'e. ohin lora Timor-Leste sai ona rai ida livre no independénte, maibé antes rai ne'e ses-an husi invazór sira ho Koloniál sira, la'os hanesan mehi de'it hodi entrega rasik husi bandeza mai ita ka mosu mai hanesan bainaka bo'ot hodi tara ba kakorok kedas, ka monu husi lalehan ka mosu hanesan milágre, ne'e la'e no nunca! Tanbá ita konsiente katak, buat hotu ne'e presiza esforsu ka luta inklui rezultadu independénsia ne'e rasik. Entaun liu husi prosesu todan no moruk lubuk ida, desde 1515 to'o mai 1999, ida ne'e atu dehan katak, rai Timor ida ohin lora ita imajina, ne'e lori tempu naruk, no dezafiu lubuk ida maka Povu Maubere ne'e haku'ur no haka'at. Atu halo refleksaun ida kle'an hodi hatu'ur sosiedade ne'e tu'ir mehi ema wain, ema hotu ninian maka, Eskritór aranka ho baze istória Timor-Leste, tanbá ita lakoi haka'at, hodi kuda dúvida ida iha kakutak katak, la presiza hateke ba kotuk, eín sentidu ko'alia dezenvolvimentu la eín relasaun ho ain-fatin uluk, wainhira hanoin nune'e, sala no merese ita tenki perdua. liafuan perdua ne'e signífika Nasaun nu'udár ita nia Inan tenke halo auto-refleksaun. Entaun ezisténsia Kolonialista sira kleur liu iha Timór ne'e tanbá, determina husi fatór tolu hanesan; Edukasaun, Misionáriu Katóliku no Ezersitu Militar.

Baibain husi ibun ba ibun dehan no husi otas ba otas sempre tutan ba hatutan katak. Prezensa missionáriu katóliku, konsege lori ita hamri'ik metin iha fé spiritual no kuñese esensia husi Maromak ne'e rasik, ezersitu militar maka aseguira altura ne'ebá, nu'udár kontrola provínsia Timor-Portugés no Edukasaun mos hala'o papél ida signifikante, oinsá lori ema sai no ses husi nia kondisaun ida lahatene ba hatene, hanesan lee, konta/sura no hakerek ka ideia sentrál baibain hanaran, lori Maubere analfabetizmu ba alfabetizmu. Husi ne'e ita presiza halo interpretasaun ida estensiva, ida ne'e atu dehan katak, buat pozitivu balu ne'ebé karik ita fó agradese maibé ita presiza mos hare'e husi efeitu negativu hirak ne'ebé, hahoris konsekuénsia ba Povu ne'e tenpu kle'ur vitima didi'ak iha knu'uk koloniál ne'e rasik.

Durante prezensa iha ne'e, povu minoria simu sira ho liman rua, nune'e mos iha sorin seluk povu maioria mos la konkorda desizaun balun ne'ebé impoeñ, entre hirak ne'ebé la konkorda ezisténsia kolonialista sira nian mos, balun foti pozisaun monok, balu hasoru ho funu. Emar sira hamutuk ka hanoin ida de'it ho Opresór sira ne'e, mesak Liurai no iha riku soin na-resin, hirak ne'ebé foti papel ida kontra ukun ida ne'e mai ho klase sira ne'ebé nivel ás no iha nia sirkulu halibur ema barak (reinu) no hirak ne'ebé foti pozisaun silensiu (dilemátiku/maioria) ne'e ho klase ida subordinadu. Dalabarak sente katak kolonialista de'it maka halo ita ema sira terus, maibé husi klase Liurai ne'ebé hamutuk ho koloniál sira mos¹ sempre haterus

¹ São Paulo, Marta Harnecker Gabriela Uribe, Luta de Classe, 1980, pg. 47 – ideia ne'e dudu husi korrente pensamentu Karl Marx (1818-1883).

maioria ne'ebé polítikamente la konsiente nune'e mos ekonomikamente laiha riku no buat hotu.

Ida ne'e lori ita, hateke liu tan katak, maioria ne'ebé nu'udár hasarán-an klase subjuguadu, momentu ne'ebá nu'udár espasu estratéjiku ba klasé koloniál no liurai, hodi hanehan, diskrimina, oprime, tortura no defama tu'ir vontade klasé leten nian. Hanesan Livru Luta de Klasse ne'ebé hakerek husi Marta Harnecker no Gabriela Uribe hateten, "*a existência da sociedade a partir da escravatura ate em hoje como capitalismo não é outra coisa mas é um luta de classe*", katak, sosiedade depoiz de komunal primitivu iha faze ida sistema ekonomia política eskravatura to'o ohin loron mantein ho luta de klasé, ida ne'e sentidu, ema oituan ne'ebé iha forsa política no ekonómia mantein aseguara poder ne'e no iha sorin seluk maioria ne'ebé la hetan lejitimidade, sempre mout no tu'ir de'it klase leten nian. Ita la'os mout iha ne'e, maibé fó lalatak ida iha ita nia kakutak katak, entre klasé Koloniál ho klase Maubere, ida iha poder dominante no sorin ida, sai klase ida ne'ebé tu'ir de'it, klase Kolonial sai nain ba desizaun iha saida de'it no Povu Maubere ne'e rasik laiha buat ida, nune'e sai de'it servidór ida gratuitamente ba klase leten hodi utiliza eh supa konforme sira nia hakarak. Aliende supa no na'ok povu maubere nia forsa, ra'an no hanoin, supa ka esplora mos ita nia riku-soin tomak sira iha rai leten no rai okos. Ne'e fenomena ida konkreta. Iha ita nia matan laran atu hare'e, iha ita nia tilun raba'at hodi rona, nune'e mos iha ita nia inus-kuak laran kedas hodi horon. Maske istória ona maibé nia lalatak pratika sira sei hela permanente ho ita.

Kondisaun objektiva ne'ebé mensionadu maka hanorin Povu ne'e atén-brani, povu ne'e konsiente, povu ne'e hatene separa saida mak lo'os no saida mak sala. Iha momentu hanesan lia-lo'os mai dadaun, tanbá hahu hamoris filozófia ida nia interpretasaun kle'an maka, konseitu Maubere ne'e rasik. Liafuan Maubere antes uluk liu bá, sai de'it naran baibain iha uma lisan ka parte Oeste sira. hanesan ema Mambae sira nia naran jentiu, no ida ne'e fasil ba poder nain sira iha altura ne'ebá, la importa hodi hatene Timor-oan nia naran ida-idak, ida malorek liu mai ita katak, la dignifika valor humanu nu'udár ema. Sente fuan moras no lakoi ukun ne'e, tanbá ita iha kultura ida respeita malu hanesan maun-alin, fetosán no umane respeita malu no tane-malu tebes, to'o ita nia asu ho fahi iha uma ninin mos ita fó naran, maibé kolonial sira bolu eín jerál de'it mane hotu-hotu hanaran Maubere no fetos hotu-hotu hanaran Buibere. Nune'e fasil ba sira atu manda ka haruka. Sira saran Maubere ne'e la hanesan saida mak karik ba ita pozitivu hodi ita imajina, maibé Maubere ne'e konsidera beiktén, fo'er, analfabetizmu, ki'ak, la'orai no bulak. Ho dinamika kondisaun ida ne'e Povu Maubere konsege hadau nia auto-determinasaun hodi proklama ninia proklamasau unilateral iha loron 28 fulan novembru tinan 1975.

Epóka invazór

Husi proklamasau ne'e, la konsege lori Povu ne'e husi esplorasau husi ema ba ema no sistema ba ema, tanbá depoiz Kolonialista sira husik Timór, Rai viziñu teki-teki tama husi kalohan eh lalehan, tasi no foho-leten no rai maran. Hodi haterus hetok aat liu tan, iha ne'ebé repete fila-fali pratika sira knu'uk sesante sira nian, maibé husi forsa Povu Maubere nian ho aten-brani, unidu no solidu konsege sátan no kore-an husi rejime Soeharto nian.

Hetán vitória ida serteja tanbá komponente tolu, hanesan komponente armada klandestina/urbanizasaun no diplomata (eín jerál Povu tomak) iha relasaun organiku ida eficiente teb-tebes no konsege lori Timor-Leste to'ó referendu iha 30 de agustu 1999, ho rezultadu 78,5% auto-determinasaun no 21,5% integrasaun. Ho rezultadu Povu Maubere nian konsege restaura hikas ukun-rasik-an iha loraun 20 fulan maiu tinan 2002 no hatu'ur Estadu ida no rekoñese komunidadade internasionál, ne'ebé aprova iha Governasaun da-huluk, nune'e adota Estadu Direitu Demokrátiku, Estadu Soberanu, Estadu Independénte, Estadu Unitáriu, Estadu bazeia ba Vontade Populár no Estadu bazeia ba Dignidade ema moris ida-idak nian konforme Lei-Inan artigu I parte I.

Epóka ukun-rasik-an

Introdusaun

Boa governasaun, ita ko'alia kona ba ukun ka poder ne'ebé hetan lejitimidade husi Povu, ho kapasidade governativa ida reflektivu ba Sidadaun sira nia nesesidade no interese. Nune'e ho meius polítikus nia fins, Povu mak sai benefisiáriu. Ko'alia no define governasaun de'it abstratu liu. Tanbá modelu dezvoltimentu iha nível globál barak tebés, depende ba País ida opta sistema ida ne'ebé. Nune'e mos Timor-Leste nia iha modelu governasaun rasik. Entretantu dinámika ukun desde primeiru Governu Konstituisional to'ó ohin loraun, hodi halo avaliaun maka hare'e husi parte rua; ida maka hare'e lei no rua hare'e ba faktu sira ne'ebé kada periodu governasaun troka malu ukun ne'e refere.

Ita nia baze konstituisional ne'e nu'udar rezultadu husi vontade popular, iha ne'ebé aprova husi Primeiru Governu Konstituisional, nune'e maka hare'e artigu 67º kona ba Órgaun Soberánia nian maka; Prezidente-República, Parlamentu Nasionál, Governu no Tribunál sira, husi baze ne'e lori ita ba hare'e iha artigu 69º nia relasaun ne'ebé la'os de'it independénte, maka iha klauzula refere define, Órgaun Soberánia sira, iha sira-nia relasaun ba-malu no wainhira hala'o kna'ar, tenke tu'ir prinsipiu separasaun no interdependénsia kbi'it nian ne'ebé iha Lei-Inan nia laran.² Katak aliende iha korelasaun ba malu iha mos independénsia tarefa. Iha ne'e maka direksiona ita ba hare'e kada servisu idak-idak nia parte, nune'e Prezidente República aliende simbolu Estadu sai mos determinante ba promulgasaun orsamentál no desizaun komun nian, Parlamentu Nasionál maka órgaun daruak ne'ebé hala'o mos papel signifikante no hasaran-an sai lalatak, ibun, fuan no lalatak Povu nian iha uma fukun Plenária, no konkretu liu, baibain iha papel tolu ne'ebé ezerse maka halo lei, halo fiskalizaun no halo desizaun política, Governu mos entre órgaun sira seluk, nia mos Órgaun ne'ebé importante hodi ezerse funsaun hanesan ezejuta no kria dekreto-lei ba

² RDTL, 2002, *Konstituisaun Republika Demokratika Timor Leste*, Primeiru Governu Konstitusional. Pj 84.

implementasaun interese ema hotu nian no ikus Tribunál mos órgaun ne'ebé asume papel ida importante hodi kontrola prosesu tomak, liu-liu nia eficiente no efikáz ne'e rasik.

Orguillu nu'udár sidadaun ida ne'ebé pertense mos ba Estadu RDTL ne'e, tanbá baze demokrasia hahu fó biban ba povu hodi tula poder ne'e ba hirak ne'ebé tau konfiansa bá. Husi fiar ne'ebé oferese nu'udár tusan ida atu fó fila, liu-husi programa polítiku durante periodu ukun. Hatutan ho neon kontente tanbá depoiz ukun-an, povu hahu dada-ís livre, desizaun injustu bele ona reklama no hatama petisaun, hatete no hakilar ba mai katak, agora ita iha Nasaun rasik hanaran Timor-Leste la'os ona Provinsia Timur-Timur no seluk seluk tan. Ho hirak ne'e ita hotu hanoin katak. Nasaun ne'e la'o di'ak no lo'os ona, maibé presiza duni le'es ita matan hodi hare'e durante tinan rua-nulu ho balun saida mak Povu no Raí ne'e hasoru.

Ida ne'e atu fó hanoin mai ita katak, kona-ba kondisaun konkreta la presiza husu malu, ohin loron di'ak ka la'e, no bá Timór nia dezvoltimentu ohin loron oinsá! Maibé evita ida ne'e maka ita fiar ba kondisaun sira ita hare'e kedas ho matan, no kondisaun ne'e sempre honestu mai ita. Katak, ki'ak atinje 42% iha nivel Sudeste-Aziátiku, mal-nutrisaun atinje 47% iha rejiaun Sudeste-Aziátiku, baze literásia ki'ik liu mos iha nivel ASEAN, nesesidade báziku liu mos sempre inporta husi Nasaun sira seluk, mesmu nune'e iha sorin seluk setor produtivu sira la dezenvolve alias foku liu ba setor non-produtivu sira. Ho faktu hirak ne'ebé define, razoavél liu, nune'e obrigatóriamente investe iha setor hirak ne'ebé diretamente fó benefisiu ba Povu (pro-Povu), maibé hirak ne'e la akontese, saida mak ita hare'e ne'e maka, Setór agrikultura to'o de'it 2.3%, setór edukasaun 9.2%, setór saúde 6.2%, iha sorin seluk setór sira la fó benefisiu ba Povu maka sa'e ho pursentu altu, hanesan setór Estrada sa'e to'o 11.7%, Administrasaun sa'e to'o 9.8% no Veteranu sira sa'e to'o 9.5%, ne'e emocionálmente espresa katak, Povu hamlaha la ha'an Estrada no la ha'an eletersidade nia enerjia no nein hemu lampu lakan nia naroman, sim ida ne'e presiza maibé nesesidade sekundaria.

Hirak define liu bá, tu'ir lo'os iha poténsia bo'ot hodi dezenvolve. Tanbá Kondisaun nesesáriu rua hodi rezolve hanesan; PDHJ liu-liu KAK. Maske iha Órgaun Independénte rua ne'e eziste desde 2004 no 2009 maibé to'o ohin loron la hare'e no nein iha mudansa, maibé korupsaun buras ba beibeik (má governasaun).

Espresaun universal ne'ebé sempre dehan KAK tantu PDHJ laiha nehan no kbi'it hodi kombate tanbá razaun esensial maka, só de'it Ministériu Públiku maka assume papel ida determinante. Husi ne'e sukat katak, maske indisius bele forte maibé MP kuandu arkiva

konsereteza labele promove ona bá Tribunal, nune'e kazu ne'e rasik hakoi-an no mout sein iha lalatak.

Tanbá ne'e maka kazu korupsaun sai ona lisan no toman iha ezisténsia sosiedade ohin loron nian. Atu kombaté ida ne'e, presiza konsiensia humana ema tomak nian (kesadaran), espésie Timór-Leste nesesária tebés KAK iha possibilidade tomak sai dirijente ba kualker kazu korupsaun, purtantu la presiza liu husi Ministériu Públiku maibé trata espésial ka direktamente ba Tribunál. Ida ne'e tanbá, baibain hare'e Instituisaun Independénte rua apenas fó hanoin de'it atu kontribui ba Parlamentu Nasional, Liña Ministérial no Tribunál. Entaun ikus-mai gastus bo'ot maibé kna'ar atu halakon korupsaun nunka akontese, indiretamente gastus bo'ot ne'e mos kontribui fila fali ba korupsaun.

Dezenvolvimentu

Pasu barak, Povu Timór haka'at. Aumesmu, era-prezenti iha kapasidade hodi deskobre saida mak dezafiu no ida ne'ebé mak oportunu, hodi aprende fila-fali husi erru sira. Nune'e foti pasu do'ok ba oin. Ida ne'e lori hodi hare'e ba kotuk, no oferese mensajén ida kle'an no mensajén ne'e rasik la to'o de'it iha interpretasaun ka hanesan de'it istória ibun tutun nian, nune'e konta ba mai maibé sein valor. Tanbá ne'e konsientemente heransa libertasaun Povu ne'e, kuidadu no sei iha valor karik, responsabilidade moral Povu tomak nian, liu-liu Estadu ne'e rasik. Katak, Estadu sai inan ida, ne'ebé iha kbi'it bo'ot hodi sústenta nia oan sira, hanesan mos Estadu ne'ebé bele iha polítika ida definitivu nune'e fó korespondénsia ba sidadaun sira nia preokupasaun, liu-husi ukun ne'ebé Povu ne'e rasik oferese, husi sufrájiu universal. Katak, sidadaun hotu-hotu³ ho tinan sanulu-resin-hitu ba leten, iha direitu atu hili tiha ona tuir demokrasia, ba vida polítika no ba asuntu públiku nian iha rai laran, aliende ne'e salienta iha alinea "b" define hala'o direitu sufrájiu ne'e katak, kona-ba ema ida-idak, no hanesan devér síviku ida. Katak, poder ne'ebé tula ba minoria ne'ebé halai ketak hodi forma Estadu ne'e nu'udár poder popular ida. Iha ne'ebé nia efeitu pozitivu ne'e fila-fali ba Povu, eín sentidu Povu ne'e mak hetán nia benefisiu direta husi ukun ne'e rasik, tanbá Povu ne'e mak sakrifika Poder ne'e refere. Nune'e implementasaun ukun iha kada periodu to'o mai Governasaun da-sia, iha asuntu sosiál barak ezize hanesan, jovén dezempregu, mal-nútrisaun, ki'ak sidade ka setór estratéjiku hagdásak no seluk-seluk tán. Mesmu kondisaun objetiva hirak ne'e akontese maibé iha sorin seluk mos korupsaun kontinua la'o no buras, nune'e trava

³ KLA CAC BA DALA XII. Deklarasaun Rendimentu, Buletin Integridade Komisaun Anti Korupsaun, 2021 – ida ne'e nu'udár dados konkreta ida ne'ebé peskiza iha rai laran.

dezenvolvimentu no fó preuiju ba povu nia nesesidade báziku, purtantu nesesidade sekundáriu no tersiáriu ne'e defísil liu tan. Tanbá ne'e esplika no apresenta mos progresu no inkerítu balun hodi atualiza dados sira desde 2019 to'o 2021; kazu pendénte 2019 hamutuk (3), kazu pendénte 2020 hamutuk 27, kazu pendénte 2021 hamutuk 46 nune'e total kazu durante tinan hamutuk 76, relatóriu ba Ministériu Públiku hamutuk 36, total kazu sei iha prosesu investigasaun hamutuk 40 no prosesu rua mak titular prosesu husu avoka fali. ida ne'e foin metade no ki'ik liu, tanbá hirak ne'ebé inrejistadu ka la konsege deskobre ne'e barak tabés, karik nune'e problema Estadu nian, nia nível ne'e króniku liu ona, no bele rezolve maibé lori tenpu ida kleur no naruk. Tu'ir lolo'os iha possibilidade tomak tanbá Timor-Leste rasik iha órgaun independénte Provedór Direitus Umanus no Justisa ninian, aliende ne'e mos ita órgaun independente seluk hanaran, Korupasaun Anti Korupasaun (KAK) ne'ebé iha forsa tebés hodi kontrola no tau matan ba kazu krime korupasaun iha Instituisaun Públiku sira.

Hare'e ba ezisténsia órgaun independénte rua ne'e, mesmu iha autonómia ba desizaun sira, maibé nafatin laiha kbi'it rasik hodi redúz aktu krime korupasaun ne'e rasik, sátan rezolve ne'e defísil liu ona. Ida ne'e akontese tanbá durante ne'e hare'e katak, mesmu iha kondisaun nesesária lubuk ida maibé kazu hirak ne'e kontinua mosu iha ita nia faze konstrusaun Estadu ne'e rasik. Faze ne'e nu'udár parte edukasionál ba sosiedade tomak, hodi reflète no hala'o konsiénsia ezame. Maka, nomeasaun polítika ne'e mos sai hu'un bá CAC ne'e rasik hodi lakon nia esensia hanesan kombate korupasaun. Tanbá nomeasaun Polítika sei lakon integridade tomak nune'e iha prejudikasaun bo'ot ba nia profional no desizaun sira, ikus mai resulta Povu ne'e muktik eh frazil liu-tan. Sorin seluk mos KAK tantu PDHJ apenas identifika problema maibé laiha kompeténsia ida hodi levanta to'o rohan, ida ne'e atu dehan se fó de'it hanoin maka, Ministériu Públiku nafatin determinavel ba problema ne'ebé identifika, hanoin ne'e susar tanbá interese MP sei arkiva no kansela nune'e labele promove kazu hirak ne'e ba oin, atu dehan MP iha Estadu RDTL assume lejitimidade hodi trava lia-lo'os, nune'e kazu barak pendente de'it.

Konkluzau

Ko'alia kona ba boa governasaun, hare'e husi fatór hotu-hotu ne'ebé kontribui ba dezenvolvimentu ida di'ak no garantidu. Atu to'o iha ne'e maka orientasaun polítika ida definitivu no pro-povu. Katak, programa ne'e rasik tenki direciona ba vizaun konstitusionál, iha ne'ebé preve iha artigu 6º kona moris di'ak sosiedade eín jerál.

Meta ne'ebé lei-inan ne'e hakarak, presiza órgaun independénte hanesan; KAK ho PDHJ aliende proibe nomeia husi nomeasaun política, Órgaun Independente rua ne'e, Estadu liu-husi Governu atribui kompeténsia ida nune'e atu promove kazu, labele liu husi Ministériu Públiku. Nune'e evita impoeñ interese partidária iha instituisaun pública no mos arkiva ka trava kazus indisius forte sira. Nune'e bele ezerse funsaun ida transparente, neutrálidade, prifisionálizmu, honéstidade no responsábilidade, hafoin ida ne'e maka ita bele to'o iha heransa lulik ne'ebé, ema lubun sakrifika maka; independénsia ida totál kondisionál no completa.

Referénsia/Bibliografía:

- Konstituisaun RDTL 2002
- *De Jesus, Leonel Carvalho (2011)*. As memórias da luta ASDT áte ao referendo.
- *Harnecker no Uribe (1980)*. Luta de classe
- *Savio, Yazalde Manaca (2019)*. Logíka kulturál
- Dokumentu ofisiál PEDN 2011-2030
- Biblioteca Movimentu Letrás

Hosi: Cedelizio V. M. C. do Rego, UNITÁL/CISPOL (75606472)